



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՎՃՌԱԲԵԿ ԴԱՏԱՐԱՆԻ ՆԱԽԱԳԱՀ**

Ո Ր Ո Շ ՈՒ Մ

**ԵՆԹԱԿԱՅՈՒԹՅԱՆ ՄԱՍԻՆ ՎԵՃԸ ԼՈՒԾԵԼՈՒ
ՎԵՐԱԲԵՐՅԱԼ**

28 հոկտեմբերի 2022 թվական

ք. Երևան

ուսումնասիրելով ըստ հայցի Ծովիկ Սարգսյանի ընդդեմ «Ինտելոբանկ» փակ բաժնետիրական ընկերության՝ անշարժ գույքի հիփոթեքի պայմանագիրն անվավեր ճանաչելու պահանջի մասին, թիվ ԵԴ/30934/02/20 քաղաքացիական գործի ենթակայությունը որոշելու նպատակով Վճռաբեկ դատարանի նախագահին ուղարկելու մասին ՀՀ սնանկության դատարանի 2022 թվականի հոկտեմբերի 18-ի որոշումը,

Պ Ա Ր Զ Ե Ց Ի

Գործի դատավարական նախապատմությունը.

1. Ծովիկ Սարգսյանը (այսուհետ նաև՝ Հայցվոր) 2020 թվականի հոկտեմբերի 22-ին հայցադիմում է ներկայացրել Երևան քաղաքի առաջին ատյանի ընդհանուր իրավասության դատարան ընդդեմ «Ինտելոբանկ» ՓԲԸ-ի (այսուհետ՝ Պատասխանող):

2. Երևան քաղաքի առաջին ատյանի ընդհանուր իրավասության դատարանի (այսուհետ՝ նաև՝ Դատարան)՝ 2020 թվականի նոյեմբերի 13-ի որոշմամբ հայցադիմումն ընդունվել է վարույթ:

3. Դատարանի 2022 թվականի հուլիսի 4-ի որոշմամբ քաղաքացիական գործը հաճնվել է ՀՀ սնանկության դատարանի քննությանը:

4. Մսանկության դատարանի 2022 թվականի հոկտեմբերի 18-ի որոշմամբ քաղաքացիական գործի ենթակայությունը որոշելու նպատակով գործն ուղարկվել է Վճռաբեկ դատարանի նախագահին:

5. Գործը Վճռաբեկ դատարանում ստացվել է 2022 թվականի հոկտեմբերի 21-ին:

Ենթակայության մասին վեճի լուծման համար էական նշանակություն ունեցող փաստերը.

6. 2020 թվականի հոկտեմբերի 22-ին դիմելով դատարան՝ Հայցվորը պահանջել է անվավեր ճանաչել Պատասխանողի իրավանախորդ «Պրոկրեդիտ բանկ» ՓԲԸ-ի և Մարո Ներսիսյանի, Սամվել Ներսիսյանի, Ժորա Ներսիսյանի և իր միջև 2014 թվականի ապրիլի 11-ին կնքված՝ Երևան քաղաքի Ե. Թադևոսյան փողոցի 13-րդ շենքի 16-րդ բնակարանի գրավի (հիփոթեքի) թիվ 48483 պայմանագիրը¹:

7. Վիճարկվող գրավի (հիփոթեքի) պայմանագրով որպես «Պրոկրեդիտ բանկ» ՓԲԸ-ի նկատմամբ Ա/Ձ Արսեն Եղիազարյանի ստանձնած վարկային պարտավորությունների ապահովում գրավադրվել է Երևան քաղաքի Ե. Թադևոսյան փողոցի 13-րդ շենքի 16-րդ բնակարանը, որը համատեղ բաժնային սեփականության իրավունքով պատկանում է Մարո Ներսիսյանին, Սամվել Ներսիսյանին, Ժորա Ներսիսյանին և հայցվոր Ծովիկ Սարգսյանին²:

8. Թիվ ԵԴ/0278/04/18 սնանկության գործով Մսանկության դատարանի 2018 թվականի մայիսի 14-ին կայացրած վճռով Արսեն Եղիազարյանը սնանկ է ճանաչվել: Մսանկության դատարանի 2019 թվականի ապրիլի 15-ի որոշմամբ հաստատվել է Ա.Եղիազարյանի սնանկության գործով պարտատերերի պահանջների վերջնական

¹ Տե՛ս քաղաքացիական գործը, հատոր 1, թերթեր 74-84:

² Տե՛ս քաղաքացիական գործը, հատոր 1, թերթեր 39-44:

ցուցակը, որում ընդգրկվել է նաև Պատասխանողի 30.240,92 ԱՄՆ դոլարի չափով ապահովված պահանջը: Մասնկության դատարանի 2020 թվականի մարտի 6-ի որոշմամբ թույլատրվել է Երևան քաղաքի Ե.Թադևոսյան փողոցի 13-րդ շենքի 16-րդ բնակարանի հրապարակային սակարկություններով վաճառքը³:

9. Հղում կատարելով ՀՀ քաղաքացիական դատավարության օրենսգրքի 18-րդ հոդվածի 1-ին մասին, 25-րդ հոդվածի 3-րդ մասին, «Մասնկության մասին» ՀՀ օրենքի 4-րդ հոդվածի 3-րդ մասին՝ Երևան քաղաքի առաջին ատյանի ընդհանուր իրավասության դատարանը 2022 թվականի հուլիսի 4-ի որոշմամբ քաղաքացիական գործն ըստ ենթակայության ուղարկել է Մասնկության դատարան⁴:

10. Հղում կատարելով ՀՀ քաղաքացիական դատավարության օրենսգրքի 18-րդ հոդվածի 1-ին մասին, մինչև 2020 թվականի ապրիլի 15-ը գործող խմբագրությամբ «Մասնկության մասին» ՀՀ օրենքի 4-րդ հոդվածի 2-րդ մասին՝ Մասնկության դատարանը 2022 թվականի հոկտեմբերի 18-ի որոշմամբ գտել է, որ սույն գործը ենթակա է Երևան քաղաքի առաջին ատյանի ընդհանուր իրավասության դատարանին և այդ առնչությամբ դիմել է Վճռաբեկ դատարանի նախագահին՝ նշելով, որ թիվ ԵԴ/0278/04/18 սնանկության գործով պարտապանը Արսեն Եղիազարյանն է, որին սույն հայցադիմումով որևէ նյութաիրավական պահանջ չի ներկայացվել: Դատարանն ընդգծել է, որ պարտապանը որևէ քաղաքացիաիրավական վեճով չի հանդիսանում պատասխանող կամ պատասխանողի կողմում հանդես եկող երրորդ անձ⁵:

Վճռաբեկ դատարանի նախագահի պատճառաբանությունները և եզրահանգումը.

11. Սույն գործով Վճռաբեկ դատարանի նախագահի առջև բարձրացված իրավական հարցը հետևյալն է. *արդյո՞ք առկա են «Մասնկության մասին» ՀՀ օրենքի 4-րդ հոդվածի 3-րդ մասով ամրագրված նախապայմանները՝ Ծ.Սարգսյանի*

³ Տե՛ս Datalex.am տեղեկատվական համակարգ, գործ թիվ ԵԴ/0278/04/18:

⁴ Տե՛ս քաղաքացիական գործը, թերթեր 87-88:

⁵ Տե՛ս քաղաքացիական գործը, թերթեր 93-97:

հայցադիմումի հիման վրա թիվ ԵԴ/30934/02/20 քաղաքացիական գործը Մասնկության դատարանի կողմից քննության առնելու համար:

12. ՀՀ քաղաքացիական դատավարության օրենսգրքի 18-րդ հոդվածի 1-ին մասի համաձայն՝ «Քաղաքացիական գործերը ենթակա են քննության առաջին արյանի դատարանում, բացառությամբ «Մասնկության մասին» Հայաստանի Հանրապետության օրենքով նախատեսված դեպքերի»:

ՀՀ քաղաքացիական դատավարության օրենսգրքի 25-րդ հոդվածի 3-րդ մասի համաձայն՝ «Դատարանը գործը հանձնում է սնանկության դատարանի քննությանը, եթե գործը քննելիս պարզվել է, որ այն ենթակա է քննության սնանկության դատարանում»:

Մինչև 2020 թվականի ապրիլի 15-ը գործող խմբագրությամբ «Մասնկության մասին» ՀՀ օրենքի 4-րդ հոդվածի 2-րդ մասը սահմանում էր, որ. «Մասնկության գործով պարտապանի գույքի կազմում ներառված գույքի և իրավունքների առնչությամբ ծագած բոլոր քաղաքացիաիրավական վեճերը, որտեղ պարտապանը հանդես է գալիս որպես պարասիսանող կամ պարասիսանողի կողմում հանդես եկող երրորդ անձ, քննվում են նույն սնանկության գործի շրջանակում»:

2020 թվականի ապրիլի 15-ին ուժի մեջ մտած՝ ««Մասնկության մասին» Հայաստանի Հանրապետության օրենքում փոփոխություններ և լրացումներ կատարելու մասին» թիվ ՀՕ-294-Ն ՀՀ օրենքով «Մասնկության մասին» ՀՀ օրենքի 4-րդ հոդվածի 2-րդ մասով սահմանված կարգավորումը վերանայվել է և նույն հոդվածի 3-րդ մասում սահմանվել է հետևյալ կարգավորումը. «Մասնկ ճանաչված պարտապանի գույքի կազմում ներառված գույքի և իրավունքների, երրորդ անձին պարկանող ապահովված իրավունքի առարկայի, պարտապանի և պարտարհրոջ մասնակցությամբ կնքված, ներառյալ՝ պարտավորությունների կարարման ապահովման միջոցների պայմանագրերի առնչությամբ ծագած և պարտադերերի պահանջների բավարարման հնարավորության վրա ազդող վեճերով քաղաքացիական գործերը, բացառությամբ կառավարչի կողմից ներկայացվող հայցերով հարուցվող քաղաքացիական գործերի, քննում է սնանկության գործը վարող դատավորը նույն սնանկության գործի շրջանակում որպես առանձին քաղաքացիական գործեր»:

13. Սույն որոշման նախորդ կետում վկայակոչված իրավական նորմերի վերլուծությունից հետևում է, որ քաղաքացիական գործերը, որպես կանոն, ենթակա են քննության առաջին ատյանի դատարանում: Այս ընդհանուր կանոնից բացառություն է սահմանված սնանկության գործերի համար, որոնց վարումն իրականացնում է Սնանկության դատարանը: Սնանկության դատարանը միաժամանակ իրականացնում է նաև սնանկության գործով պարտատերերի պահանջների բավարարման հնարավորության վրա ազդեցություն ունեցող այն քաղաքացիաիրավական վեճերի քննությունը, որոնք համապատասխանում են «Սնանկության մասին» ՀՀ օրենքի 4-րդ հոդվածով սահմանված նախապայմաններին:

Գործող խմբագրությամբ «Սնանկության մասին» ՀՀ օրենքի 4-րդ հոդվածի 3-րդ մասի վերլուծությունից հետևում է, որ քաղաքացիական գործը ենթակա է քննության սնանկության դատարանում սնանկության գործը վարող դատավորի կողմից նույն սնանկության գործի շրջանակում որպես առանձին քաղաքացիական գործ հետևյալ նախապայմանների միաժամանակյա առկայության դեպքում.

ա) քաղաքացիաիրավական վեճը պետք է ծագած լինի «Սնանկության մասին» ՀՀ օրենքի 4-րդ հոդվածի 3-րդ մասով նախատեսված օբյեկտներից որևէ մեկի առնչությամբ,

բ) վեճի լուծումը պետք է ազդի պարտատերերի պահանջների բավարարման հնարավորության վրա,

գ) սնանկության գործը պետք է գտնվի քննության փուլում, այսինքն՝ սնանկության գործի վարույթը պետք է ավարտված չլինի:

14. Սույն քաղաքացիական գործի նյութերի ուսումնասիրությունից հետևում է, որ.

- Ծ.Սարգսյանը Երևան քաղաքի ընդհանուր իրավասության դատարան է ներկայացրել հայցադիմում՝ «Ինտեկոբանկ» ՓԲԸ-ի իրավանախորդ «Պրոկրեդիտ բանկ» ՓԲԸ-ի և Մարո Ներսիսյանի, Սամվել Ներսիսյանի, Ժորա Ներսիսյանի և իր միջև կնքված անշարժ գույքի գրավի (հիփոթեքի) պայմանագիրն անվավեր ճանաչելու պահանջի մասին⁶, որը Երևան քաղաքի առաջին ատյանի ընդհանուր

⁶ Տե՛ս սույն որոշման 6-րդ կետը:

իրավասության դատարանի՝ 2020 թվականի նոյեմբերի 13-ի որոշմամբ ընդունվել է վարույթ⁷,

- Վիճարկվող գրավի (հիփոթեքի) պայմանագրով որպես «Պրոկրեդիտ բանկ» ՓԲԸ-ի նկատմամբ Ա/Ձ Արսեն Եղիազարյանի ստանձնած վարկային պարտավորությունների ապահովում գրավադրվել է Երևան քաղաքի Ե. Թադևոսյան փողոցի 13-րդ շենքի 16-րդ բնակարանը, որը համատեղ բաժնային սեփականության իրավունքով պատկանում է Մ.Ներսիսյանին, Ս.Ներսիսյանին, Ժ.Ներսիսյանին և հայցվոր Ծ.Սարգսյանին⁸,

- Թիվ ԵԴ/0278/04/18 սնանկության գործով Մնանկության դատարանի 2018 թվականի մայիսի 14-ին կայացրած վճռով Արսեն Եղիազարյանը սնանկ է ճանաչվել: Մնանկության դատարանի 2019 թվականի ապրիլի 15-ի որոշմամբ հաստատվել է Ա.Եղիազարյանի սնանկության գործով պարտատերերի պահանջների վերջնական ցուցակը, որում ընդգրկվել է նաև Պատասխանողի 30.240,92 ԱՄՆ դոլարի չափով ապահովված պահանջը: Մնանկության դատարանի 2020 թվականի մարտի 6-ի որոշմամբ թույլատրվել է Երևան քաղաքի Ե.Թադևոսյան փողոցի 13-րդ շենքի 16-րդ բնակարանի հրապարակային սակարկություններով վաճառքը⁹,

- Հղում կատարելով ՀՀ քաղաքացիական դատավարության օրենսգրքի 18-րդ հոդվածի 1-ին մասին, 25-րդ հոդվածի 3-րդ մասին, «Մնանկության մասին» ՀՀ օրենքի 4-րդ հոդվածի 3-րդ մասին՝ Երևան քաղաքի առաջին ատյանի ընդհանուր իրավասության դատարանը 2022 թվականի հուլիսի 4-ի որոշմամբ քաղաքացիական գործն ըստ ենթակայության ուղարկել է Մնանկության դատարան¹⁰,

- Հղում կատարելով ՀՀ քաղաքացիական դատավարության օրենսգրքի 18-րդ հոդվածի 1-ին մասին, **մինչև 2020 թվականի ապրիլի 15-ը գործող խմբագրությամբ «Մնանկության մասին» ՀՀ օրենքի 4-րդ հոդվածի 2-րդ մասին**՝ Մնանկության դատարանը 2022 թվականի հոկտեմբերի 18-ի որոշմամբ գտել է, որ սույն գործը ենթակա է Երևան քաղաքի առաջին ատյանի ընդհանուր իրավասության դատարանին և այդ առնչությամբ դիմել է Վճռաբեկ դատարանի նախագահին՝

⁷ Տե՛ս սույն որոշման 2-րդ կետը:

⁸ Տե՛ս սույն որոշման 7-րդ կետը:

⁹ Տե՛ս սույն որոշման 8-րդ կետը:

¹⁰ Տե՛ս սույն որոշման 13-րդ կետը:

նշելով, որ թիվ ԵԴ/0278/04/18 սնանկության գործով պարտապանը Արսեն Եղիազարյանն է, որին սույն հայցադիմումով որևէ նյութաիրավական պահանջ չի ներկայացվել: Դատարանն ընդգծել է, որ պարտապանը որևէ քաղաքացիաիրավական վեճով չի հանդիսանում պատասխանող կամ պատասխանողի կողմում հանդես եկող երրորդ անձ¹¹:

15. Նախորդ կետում մեջբերված փաստական հանգամանքները գնահատելով սույն որոշման 12-13-րդ կետերում վկայակոչված իրավադրույթների և արտահայտված իրավական դիրքորոշումների լույսի ներքո, նախևառաջ հարկ է նկատել, որ տվյալ դեպքում թիվ ԵԴ/30934/02/20 քաղաքացիական գործը հարուցվել է 2020 թվականի նոյեմբերի 13-ին, երբ արդեն իսկ գործել է «Մանկության մասին» ՀՀ օրենքի՝ թիվ ՀՕ-294-Ն ՀՀ օրենքով կատարված լրացումներով և փոփոխություններով խմբագրությունը: Հետևաբար, սույն քաղաքացիական գործի ենթակայության հարցը որոշելիս կիրառելի են թիվ ՀՕ-294-Ն ՀՀ օրենքով կատարված լրացումները և փոփոխություններն ուժի մեջ մտնելուց հետո գործող խմբագրությամբ «Մանկության մասին» ՀՀ օրենքի դրույթները: Ուստի, Մանկության դատարանի կողմից սույն գործի ենթակայությունը որոշելիս որպես հիմք ընդունված՝ մինչև 2020 թվականի ապրիլի 15-ը գործող խմբագրությամբ «Մանկության մասին» ՀՀ օրենքի 4-րդ հոդվածի 2-րդ մասը կիրառելի չէ:

Նման պայմաններում, քննարկման առարկա դարձնելով սույն որոշման 13-րդ կետում վերլուծված՝ «Մանկության մասին» ՀՀ օրենքի 4-րդ հոդվածի 3-րդ մասով նախատեսված վավերապայմանների առկայության հարցը, պետք է փաստել, որ՝

ա) սույն քաղաքացիաիրավական վեճը ծագել է «Մանկության մասին» ՀՀ օրենքի 4-րդ հոդվածի 3-րդ մասով նախատեսված օբյեկտի, այն է՝ սնանկ ճանաչված Ա.Եղիազարյանի՝ վարկային պարտավորությունների ապահովման միջոցի՝ անշարժ գույքի գրավի պայմանագրի առնչությամբ,

բ) սույն վեճի լուծումը ազդեցություն է ունենալու սնանկության վարույթի շրջանակներում Պատասխանողի ապահովված պահանջի բավարարման հնարավորության վրա,

¹¹ Տե՛ս սույն որոշման 10-րդ կետը:

գ) թիվ ԵԴ/0278/04/18 սնանկության գործը գտնվում է քննության փուլում, այսինքն՝ սնանկության գործի վարույթը դեռևս ավարտված չէ:

16. Այսպիսով, վերոգրյալի հիման վրա, գտնում եմ, որ առկա են «Սնանկության մասին» ՀՀ օրենքի 4-րդ հոդվածի 3-րդ մասով ամրագրված նախապայմանները՝ Ծ.Սարգսյանի հայցադիմումի հիման վրա թիվ ԵԴ/30934/02/20 քաղաքացիական գործը Սնանկության դատարանի կողմից քննության առնելու համար: Ուստի, թիվ ԵԴ/30934/02/20 քաղաքացիական գործը ենթակա է Սնանկության դատարանի քննությանը:

Հիմք ընդունելով վերոգրյալը և ղեկավարվելով ՀՀ քաղաքացիական դատավարության օրենսգրքի 26-րդ հոդվածի 2-րդ մասով՝

Ո Ր Ո Շ Ե Ց Ի

թիվ ԵԴ/30934/02/20 քաղաքացիական գործը՝ ըստ հայցի Ծովիկ Սարգսյանի ընդդեմ «Ինտեկոբանկ» փակ բաժնետիրական ընկերության՝ անշարժ գույքի հիփոթեքի պայմանագիրն անվավեր ճանաչելու պահանջի մասին, ենթակա է ՀՀ սնանկության դատարանին:

ՊԱՇՏՈՆԱԿԱՏԱՐ

ՀԱՄԼԵՏ ԱՍՍՏՐՅԱՆ